

Flurs surmiranas e geranis a Lucerna

Rimas ed istorgias d'in Surmiran che lascha encrescher

■ (anr/vi) Pli baud ha Conrad Cotti marclà flurs en il fier. Oz ch'il fravi d'art è pensiunà, furma el ses ornamentals cun peds. El ha chattà la rima per s'exprimer. Quai che Cotti scriva il pli gugent èn versets, poesias u istorgiettas da sia patria – dal Surmeir. Questa vallada ha el bandunà en ses giuvens onns, ma ina part da ses cor è probabel adina restà là. Uschia sa numna il titel da ses nov cudesch «En muntagnard a Lucerna». Tranter las poesias chatt'ins disegns da rispli cun flurs alpinas.

Las rimas da Cotti èn era in zichel sco flurs alpinas. Il vegl ferrer descriva la vita muntagnarda. Na quella dad oz. Igl è plitost ina vita anc fermamain purila da pli baud. Ed ins senta adina l'encreschadetgna e l'amur per quella vita che Cotti ha pudì giudair be sco giuvenot. En l'introducziun scriva l'anteriur ferrer d'art: «Mias poesias èn patratgs d'in spiert muntagnard giu la Bassa che pitescha e pensa vi da qua si.» Ses raquints sajan viadis en «noss ierts», en la natira ed en la cultura rumantscha. Cun ses viadis vul Cotti oravant tut divertir ils lecturs. Sias rimas duain far plaschair per quel pitschen mument che Cotti raquinta da sia patria.

En ina u l'autra istorgietta resta Cotti dentant era giu la Bassa a Lucerna: Uschia p.ex. en la legra istorgia dals geranis da sia dunna. Lezs ha il consort numnadamain laschà pirir entant che la dunna è ida per pliras emnas giu l'Italia tar la parantella. Suentar questa «disgrazia» ha il ferrer pudì far l'experientscha ch'el fiss en sasez era in excellent ortulan: Entaifer paucas emnas èsi grategià da far flurir danovamain ils geranis, uschia che la consorta ha remartgà schuber nagut cura ch'ella è turnada. Ella ha schizunt ludà ses um per la buna tgira!

Il cudesch pon ins empustar tar l'Uniu rumantscha da Surmeir a Savognin u directamain tar Conrad Cotti, Hôchweidstrasse 32, 6030 Ebikon.

